

Sur En pront pel 22. inscunter da sculptuors

■ (anr/fa) A Sur En da Sent as chattan la mità da gün 18 artistas ed artists dad 11 pajais pel 22avel simposi our i'l liber. Quist inscunter fuorma il principì da la stà suot l'insaina da sculpturas in Engiadina Bassa ed a Tavo. Il Simposi internaziunal da sculptura a Sur En da Sent ha fingià lunga tradiziun: Pella 22avla jada lavuran d'urant ün'eivna sün l'areal dal camping artistas ed artists da differents pajais, creond sculpturas in lain, crap o cumbinà. Organisà vain il simposi da la società Art Engiadina. Ils iniziants da quist arrandschamaint cultural sun stats *Wolfgang Bosshardt* e *Jean Badel*. «Pel simposi da quist on vaina survgnì bundant 70 annunzchas», disch Bosshardt chi maina la gestiun da l'Art Engiadina, «d'incurt ha nos comitè d'organisaziun fat la tscherma e schelt 18 artistas ed artists dad 11 differents pajais, e quai na be da la Svizra, Austria e Germania, dimpersè

eir da l'Iran, Giapun e Kasachstan ed oters.» Perfin da la Russia e da l'Ucraina derivan duos dals partecipants.

Cun lain da larsch e marmel da Laas D'urant ün'eivna lavuran las artistas ed ils artists a Sur En our i'l liber lung la riva da l'En. Our da lain da larsch o marmel da Laas i'l Tirol dal süd crean els d'urant quists set dis lur ouvras d'art. Ils interessats, giasts dal camping, indigens e gleued chi fa üna spassegiada, pon observar co cha quistas ouvras naschan e tschüffan fuorma. Il motto dal simposi d'ingon es «ferm e debel». In sonda, ils 18 gün a partir da las trais la davomez-di es la vernissascha: Las ouvras chi vegnan preschantadas sun vnalas. Quellas chi nu vegnan cumpradas as pudaraja tour suot ögl plü tard sülla Senda da sculpturas a Sur En. L'Art Engiadina surdà quel di eir ün «Premi dal public»: Ils preschaints a la vernissascha pon in-

dichar cheniina da las ouvras chi tils placsha il plü bain.

Stà da sculpturas surregionala

Sper il Simposi da sculptura a Sur En seguan amo divers oters arrandschamaints suot l'insaina da la sculptura. L'Art Engiadina ed *Andreas Hofer* da la Galleria H.Art a Tavo han organisà insembel la «Eivna da sculpturas 2016». D'urant quella vain sporta als interessats la pussibilità da far visita ad artistas ed artists in lur ateliers a Sent, Ftan e Guarda o da frequentar pro els lavuratoris davart differents tecnicas da lavur artistica. Ils organisatuors invidan eir da visitar a Sur En la Senda da sculpturas, a Sent il Parc da sculpturas da Not dal Mor (alias *Not Vital*), da verer illa Pensiu Aldier la colleziun privata d'ouvras dals Giacomettis e da far la visita a la Grotta da cultura. Ils interessats pon eir visitar a Nairs il Center d'art contemporanea ed a Vul-

pera la Galleria l'aul chi muossa ün'exposiziun da pe horber. L'event final da quista stà da sculpturas ha lö a Tavo.

Ulteriuras informaziuns:
www.sculpturesummer.com.

Da Ramosch fin Sari i'l Iran

Al Simposi internaziunal da sculptura 2016 a Sur En dals 11 als 19 gün piglian part ingon trais artistas e 15 artists dad ünidesch pajais. Ses dals artists sun Svizzers. Qua ils noms dals partecipants, tenor uorden alfabetic: Soheyl-Reza Bastami da Sari i'l Iran lavura cun lain, Aurélien Boussin da Villepreux in Frantscha cun crap e Daniel Cotti da Ramosch cumbina quels duos materials. Stefanie Fuentes-Schreiber da Wangelstetted in Germania e Georgi Liubomirov Georgiev da Rousse in Bulgaria lavuran cun lain, Leo Horbach da Landgraaf in Ollanda cun crap. Ils oters partecipants

sun Peter Horber da Ftan/Berna (lain), Yezhan Kudaibergenov da Shimkent i'l Kasachstan (crap), Melanie Nehring da Bad Honnef in Germania (crap), Nario Nishimura da Kyoto i'l Giapun (lain), Andreas Oberli dad Alavagni Bogn (lain), René Philippe da Berikon (crap), Andreas Rendl da Reith im Alpbachtal in Austria (lain), Ivan Smirnov da Perm in Russia (lain), Ivan Stoyanov, da Yambol in Bulgaria (lain), Corinne Sutter dad Aarwangen (lain/crap), Igor Tkachivkii da Krecovez Dworska in Ucraina (lain/crap) e Rudolf Tschudin da Sissach (lain).



Eir quist on lavuran artists da tuot il muond sün l'areal dal camping a Sur En da Sent.

FOTO J.SCHÄFER

Ün exempel d'üna sculptura ch'i'd es gnüda creada l'on passà d'urant il simposi a Sur En.

FOTO A.FELLI

